
Scheibenschlagen

2000

Nachname Vorname

Löschgruppe Graf-Gurnau

Grafer Kapelle

Liabe Leit, heint mecht mar enk olla schia begrießa,
wos d'rnoch iatz kimmt, sell kuan verdrießa.
Noch oltem Brauch tia mar ou Böller schiaßa.
A Verübl, dös war ins gor it recht,
a Hetz muaß sei, wega dem tia mar's decht.
D'Fuirwehr tuat enk in dr Noat olli halfa,
drum seits it beas und lot'sas galta.

Die earscht Scheiba, die hella,
keart dr Grafer Kapella.
Daß dr hl. Johannes von Nepamuk weiterhin über ins wocht,
und in dr letschta Stund für olla a Fürsproch mocht.

Da Böller hobts keart, iatz gia mar's on,
zearscht keima huira d'Gurnauer dron.

Thöni Maria

Aus d'r Gluat isch außa die Scheiba
iat'z tia mar a bissli bei d'r Maria bleiba.
Miar wissa nit so recht wos mar dr anbieta sella
mir tata die lieber öfter in Gurnau secha wella.
Auf's Haus tuasch jo olli gut drau schaua
Dr Heizung und dr Wasserleitung komma , wennis kalt isch, ja nit aso traua.
Gsundheit setsch in dem Leba long hoba
und mir wella die iatz mit'm Sprichla nummer länger ploga.

Fam Juen Klaus Anna

Hot dr Klaus amol a freie Zeit
schaltet er sein Radio in und schaut ob's a Quizsendung geit.
Und wenn er a Frog beantwortu kann
druckt er aufs Knöpfli, und schua isch er dron.
Weil der Klaus, des isch kua Dummer
der hot sicher gspeichert vom ORF die Nummer.
Sletschthin bei dr Fuchsjogd
hat's in Klaus bsunders plogt.
3-ter Onlauf hat er miaßa nehma
bis zum Ziel isch keima.
Tua die Ballonfahrt lei fescht genießa,
nocha kann die dr Moderator vom Radio Tirol glei wieder als Stammkandidat begrießa.
Miar tia dr zu deina Gewinne herzli gratuliera,
tua nu weiterhin fleißig dei Glück probiera

FA Maschler Karl

Maschler Karl, dear Nama steahrt schua seit viele Johr für Qualität und Zuverlässigkeit, kann'r dei Auto nit glei richta nacha steahrt schua a Leihauto bereit.
Er hot bei da Serviceannahme an Haufa Diplome dinna henga,
daran kann ma schua secha seine Mitarbeiter miaßa an Haufa kenna.
A riesen Auswahl an Autos hot dar Karl auf seim Parkplatz stiahn,
wenn Eppar da nix passends findat kenna miar deas numma verstiahn.
Ou bei die gebrauchta Auto isch dar Maschler alli voarna dabei,
da isch'r günstig obwohl dia Auto qualitätsgeprüft sei(n).
Im Johr 2000 sein sicher wieder an Haufa Auto zum richta und verkoufa,
und iats schloga mar a Scheiba daß d'Gschäfte ou guat tuat loufa.

Siegele Notburga

Mit dera Scheiba, di mar iatz weit auße schiaßa,
tia mar d Siegele Burgl schia begriaßa.
Miar sechasa oft unterm Haus im Garta stiah,
des Bluamabeet war ja letscht's Jahr wieder wunderschia.
Ou da Kearschboum vor deem Fenschtar isch jeds Johr a Pracht
da follt's gor it au, wenn's a paar Kearschna winiger weara über' d Nacht.
Dass dia's Gartli no long viel Freid sell mocha
loass mar iatz no an Böller laut krocha.

Siegele Gerd

Intz tuat des longsom darloda
miar tia unfach nuit vom Gerd darfroga.
Sogar d' Schwester tuat intz nix darzähla
woas wersch da eppa hoba für Sündä in deem Leba.
Und daß deas Sprichli s'negscht Johr interessanter weard,
soarg dafür daß ma unterm Johr amal eppas vu dir heart.

Siegele Werner

Dar Werner isch im ganza Land,
unter seim Spitznama Venno bekannt.
Wou d'Sprichla zum schreiba wara und i da Werner Siegele leas,
war mein erster Gedanke wear isch denn deas?
Mit dar Zeit hon I mar denkt i gloub dia spinna,
dia muana eppa da Venno vum Handl dinna.
Da tuat'r nämlich mala und Werbetexte schreiba,
sou als Marketing-Mann kansch ja allerhand treiba.
Miar haba keart daß dar Werner da anstrebt an a Manager-Funktion,
isch deas wahr, oder isch deas lei a Fehlinformation.
Miar weara dei Laufbahn in Zukunft ganz genau anschaua,
und daß sie züig vora geht tian mar dar iats a Scheiba acha haua.

Fam Siegele Waldemar

Dr Waldemar fongt in dr Pension
wieder a bissli zum Arbeita on.
Er tuat für'n Hand'l Essa transportiera
deis weart er sichar ou im Galtbeitl gspiera.
Mit'm Firmenauto fiaht er Schnitztel und Suppa
vo Pians noch Schiawies für die hungriга Truppa.
Und wenn er nuit hot vergessa
konn er sich salber hocka zum Mittagessa.

Juen Monika

D Moni losst si aus dr Ruah nit bringa,
miar heara amol nou kua Hochzeitsglogga klinga.
D' Mama tuat si dahuaam fescht verweina
so an eigana Haushalt, da miaßt ma si earsch dran gwena.
Wenn si nit grad muaß beim Wolf dunta Bluma spritza,
siaht ma d'Moni und ihren Freind auf'm Motorrad umchafllitza.

Fam Juen Josef Paula

Dia Scheiba schiaßa mar außa bsonders schiah
und bleiba beim Seppl und dr. Paula stiah.
Passiert isch dr Paula im Jänner a Missgeschick
darbei hot sie no kett a heida Glick.
A Saftfleisch kocha mit'm Kelomat geat ja gwschind
und s'Fleisch weard dabei bsonders lind.
Sie tuat da Deckl obadrau
nimmt's mit'm zudrahja nit so genau.
Trotzdem weart dr Druck saggrisch groaß
und dr Paula spritzt die Soß ins Gesicht, dia hoaß.
Dr Doktor kann ihr a guata Salba verschreiba,
dass im Gsicht kuona Narba zruggbleiba.
Dass dr soa Missgeschick set numma passiera
lossa mar nou an Böllar krepiera.

Fam Juen Hubert Erika

Ischas iatz da Gurnauer Schandi in Landeck zwiani schia,
dass es sie alla ziacht ocha nach Wien ?
Es wellt's holt alla keima weiter
a poor Sprossa auf d'r Karriereleiter.
Dia Pendlerei all Wocha isch a morts Tschoch
aber amol an Inspektorposchta isch ou a schiane Soch.
Hubert, tua nu brav wieder d'Schulbank drucka
und Vorschrifta und Gesetzla stucka.
Erika, loß dr's als Strohwitwe nit verdriaßa,
d' Fuirwehr tuat enk no on Böller schiaßa.

Fam Schmid Helmut Linde

Für'n Helli und d'Linde wor s'letscht a turbulentes Jahr
iatz sein sie froh daß es isch gor
Ongfonga hot's mit Lindes Radmissgeschick,
kriagt hot sie a'Knie gonz dick.
Glei drau hot der Helli mit'm Motorrad an Unfall bout,
und in Zams hoba s'm an Gips aucha g'haut.
S'Holza und Haja wor wirklich a ' Plog
ober Kronkastond wor er kuan uanziga Tog.
Beim Stiagarenoviera hot ma beim Kuchabalkon g'secha a Loatara stia,
wearsch it auf deine olta Tog zur Linde nou Fenschterla giah.`
Und so mocht dr Helli s`gonz Jahr wogholsiga Socha,
dr Linde isch do gor nimma zum Locha.
Hin und wieder weart ou a produktive Orbat mocht
dia nuia Stiaga isch a wohre Procht.
Daß s Zwoatausender Jahr besser weard,
iatz nou a' Raketa bleart.

Fam Schmid Harald Angelika

Dar Harald war hura bei dar Fuierwehrebschnittsprob im Mittelpunkt,
weil da hat'r als Kommandant d'Leit umagschickt und ou a bissli gfunkt.
Und wie'r dasteht und will grad a poor Leit uma delegiera,
kimmt an Tankwoga vu Landeck und will da Harald glei üben Haufa fahra.
Trotzdem, für dia Leistung hot dar Harald kriagt vu alle Seita a großes Lob,
lei mit'm schnell weckloufa vorm Tankwoga da brauchts vielleicht nou a Prob.
D'Angelika darfa mar natürlich ou nit vergessa,
sie sorgt mit die andara Frau ali für a super Weihnachtsfeier Essa.
Und was tata mar ohne Angelika beim Sprichla schreiba,
i gloub miar tata nit amal 10 Scheiba achtreiba.
Eis zwoa tiats für'd Fuierwehr wirklich gnua,
und als kluans Dankschian kriagats iat's a Scheiba und a schiane Raketa darzu.

Fam Grießer Hubert Rosmarie

Vom Hubert wiss mar deis Jahr nit soviel z'soga
drum weara mar d' Rosi a bissli ploga.
Es isch ja allseits bekont,
d'Rosi hat zum Haarrichta a guate Hand.
Sie tuat schneida, wickla, töna
und die tollschta Frisura föna.
Tuat d' Rosi an Stadtbummel in Innsbruck macha
kauft sie Haarfarb und steckt sa in d' Tasche zu da andera Sacha.
Dahuam suacht si deis Mittel wie an Dumma
deis gibt's decht nit, es isch numma umma.
Si konn's nit verstiah,
wie kann so eppas verlorä giah.
Amol holt d' Rosi aus dr Kialtrucha a Broat für'd Marend.
Da hat si auf's Mal dia Haarfarb in da Händ.
Rosi, - hasch gmuant deis Mittel zum Färba
tuat in dr Kialtrucha nit so schnell verderba !
Hubert, - geah äfter in d'Gfriertrucha eppas suacha,
wear woäß, was do alls findesch außer Fleisch und Kuacha ?

Fam Scheiber Helmut Martha

Vom Scheiber Helli wella mar huira berichta
er lößt sie vom Pianner Altherrenfußballclub olli verpflichta.
Hoba tuat er an morz Schuss
do zuschaua des isch wirklich an Genuss.
Ma siaht 'n auf der linka Seita
vo hinta bis vorna um den Ball umchafeita.
D'n eigana Bua muaß mar im Notfall ou amol faula, und Körperinsatz des keart uanfach
dazu
Lei Helli, long hosch numma von deem Bua a Ruah.
Wenn der Robert in a paar Jahrla beim Fussballspiel tuat dr's Hackli stella
nocha wearsch eppa im Krankastand - gera, länger bleiba wella.
Daß des runda Ledr tuasch treffa huira wieder genau ins Kreuzegg,
lossa mar für die d' Scheiba weit außa vom Egg.

Rainalter Ekehardt

D'r Eki tuat gera nuie Sacha ausprobiera
und so hot ,r letscht's Jahr angfanga an Dudelsack studiera.
Sall hat ma in Eki in halb Gurnau gehört mit dem Dudelsack spiela,
lei klunga hat deas am Anfang nou a bissli verschieda
Ober mit viel Übung bringt ma schua eppas zomm
Bei ,alle meine Entchen' stimmt schua foscht jeder Ton.
Iatz brauchsch nu no an Schottarock dazua probiara,
und nocha tuasch beir Fuirwehrprob amol richtig aufmarschiara.

Fam Rainalter Ekehardt Hella

Übern Ekehardt isch nia schwar was zum schreiba,
Der isch s´ganz jahr am Weg für sei Firma Auftrüg einztreiba.
Bei dem Job passiert ´m halt o manchmal a Mißgeschick,
aber er nimmt ´s mit Humor, weil des gibt ihm earsch sein Kick.
So isch ´r huira mit seim nuia Auto ins Vorarlberg gfahra,
und hat auf d´r Autobahn trotz Navigationsystem in Überblick verlor.
Iats hat der Ekehardt holt um 90 Kilometer sei Ausfahrt verpasst,
des hat ´r aber nocha glei gmerkt und isch wieder zrug grast.
Des isch ´m aber o lei passiert weil ´r d´Hella nit d´rbei ket hat,
weil dia ihm sinsch immer in richtiga Weg onsogt.
Die Hella hat halt o nit alli Zeit um auf ihren Mann aufzpassa,
Dia isch d´ganz Wocha im Gschäft und schaut daß a Geld kimt in´d Kassa.
Zum Schluß wünsch m´r enk no viel Glück beim Kartna,
und schiasa enk a Raketa in Garta.

Fam Moschen Stefan Susanne

Dr Stefan hat beim WIFI s'Unternehmertraining gmacht
di Prüfung hat er packt ,sall war decht glacht.
Da learnt ma viel vor Kalkulation bis zum Recht,
deis isch für a Firma sicher it schlecht.
Mit dem Training kanntesch insteiga in die Chefetage
da steigt nit lei die Verantwortung sondern ou die Gage.
S'negscht Jahr wear mar Susanne mia ploga
dafür tia mar iatz dia Scheiba bsunders weit ocha schloga.

Fam Huber Robert Gabi

Der Hans-Robert isch an ganz an fleißiger Bäck,
er fährt in ganza Tag her und a wieder weck.
De Arbeit in d´r Backstuba isch gar it so leicht,
und ungfährlich ou it des sog i enk Leit.
Oamal hat der HansRobert dia Finger zweit in´d Maschin icha tan,
Des war aber it so schlimm weil s´wichtigst isch no dran.
Dia Gabi set in Zukunft halt bittschia seine Finger zeila,
weil Semmel mit Finger sei nit zu empfeila.

Fam Schütz Egon Sissi

Liabe Leit, wissat´s eis wos,
dr Egon hot zu seim Haus a eigene Stroß.
Do braucht er sich wega dr Grundgrenz numma verkopfa,
und drsport sich an Haufe Nervatropfa.
An schiana Abschluss für den Weg war hold ou no recht,
so hot dr Egon baut a Maura, dia isch gwoara gor it so schlecht.
Miar tia iatz nou a Raketa in Himmel aucha joga,
dass die weiterhin tuasch ums Haus a bissli ploga.

Schütz Caroline

D'Caroline tuat gera viele neu Sacha ausprobiera
und deas Jahr hat sie sich miaßa an Computer installiera.
Dear Computer kann so viele Socha,
daß Caro muß probiera bis es im Computer lei mi tuat krocha.
Im Modem war dies glei amal z'viel
und so war sie nit lang mobil.
Deis Problem hat sie nach kurzer Zeit behoba
und iatz tuat sie sich am liebsten im Internet austoba.
Daß die ou weiterhin unfallfrei im Internet tuasch umatreiba,
tian mir nou an Böller anreiba.

Schütz Florian

Dr' Florian isch huir beim Militär ingruckt,
und am liabsta hat 'r sich da glei wieder verdruckt.
Nacha hat 's halt braucht a kurze „Eingewöhnungszeit“,
und der Flo hat sich auf jeda Marsch g'freit.
Iats hat des Baras aber it lei guate Seitza,
Dia tian den Florian scheinbar jeda Tag zum saufa verleita.
Und weil der Flo halt amal isch a so an gselliger Mensch,
vergist 'r am Samstag halt meistns sei Grenz.
Sei nuis Auto last 'r bei deina Schnall alli darhuam stian,
weil mit dia Schandi will d'r Flo nuit haba ztian.
Zum Schluß winscha miar diar no, das'd gleiamal findesch dei Traumfrau,
und lassa diar an Böller ocha, der schnellt wie die Sau.

Larcher Carmen

Dia Carmen isch a ganz a fesch's Madl,
lei was z'dünn isch des sei die Wadl.
Der Dietmar miast sie halt a bisli öfter massiera,
Sinsch kant in Zukunft a mal was passiera.
Onscheinend mog d'r Didi dös schlonk und rank
und ou dia Kunda von d'r Bank.
Ba da Hutza und bam Essa konn ma si do viel Gald d'rspora
und dr'für in an schiana Urlaub fohra.

Fam Larcher Peter Margret

In Peter sieht ma s'ganz Jahr um's Haus eppas konstruiera
und dabei den uana oder ondara Bau installiera.
S'letscht Johr hat er aufgestellt bei seim Parkplotz a Doch
Im Winter isch deis für dia Auto a feine Soch
Lei oans mechta m'r schou no wissa –
Hot's di beim Baua mit d'r Heach it a bissli verrissa?
D' Margreth mault, wos hot denn der für Flausa
I siech jo beim Kuchafenschter numma auða.
Do wearsch eppa wella
Dein nogelnuia Rossonhänger unterstella.

Vogt Helga

D' Helga isch a ruhigi Frau
Und paßt oft auf ana Haufa Kinder au.
Mit deana tuat sie ollerlei,
sogor ihre olts Spielsocha hot sie d'rbei.
Mir hatta ou an haufa Spielsoche,
drum kannsch mit ins Fuirwehr' ler ou amol a Spielettl mocha.

Vogt Irene

Mit deara Scheibe bleibe miar iatz bar Irene stiahn.
Miar tian nuit d'r froga,
ausser, daß sie sie mit'm Studiom tuat umchaploga.
Auf ihr Haustier tuat sie guat schaua, dös isch nämlich kua Kotz,
sondern an Rotz.
Ob'r sellni Viechla sei zur heitige Zeit holt in,
weil die Dorfmeister fohrt mit ihrigem ou überoll hin.

Vogt Stefan

D'Solzburg draht d'r Stefan seini Runda,
drum homm'r vo ihm ou nuit z'kritisiera g'funda.
Vor Solzburger Frauenwelt tat ma sicher eppas d'rfroga
Wos miar enk nocha kannta sogä.
An Böll'r lossa miar trotzdem krocha,
daß Du ins kuoni Schondtota tuasch mocha.

Vogt Herta

D'Herta tunkts oft recht fein,
z'Londegg daussa bam Kneippverein.
Ma sieht sie oft z'Fuaß marschiera,
sie weard eppa aufn Vereinsmeist'r trainiera.
Iatz brauchsch Dir kuani Schuach mia koufa,
weil a richtiger Kneipper tuat borfuaß loufa.
Zur Scheibe lossa miar nou an Böll'r krocha,
daß Du nou konnsch an haufa Kilometer'r mocha.

Schultes Sandra

Wia bringt ma d'Sandra aus'm Haus
ma schickt vu Nassereith da Klaus.
Deim isch dar Weg nit z'weit bis Gurnau oder gar bis auf Sea
da konns regna, hogla oder liega gar an Meter Schnea.
In See steaht sie im Weiße Lamm an dr Reception,
da tuat sie d' Gäst betreia und gibt ihna allerhand Information.

Fam Schultes Hubert Brigitte

Auf der Alp da ischas so wunderschia
sogar dar Bergmoaster will hiata giah.
Für'n Hubert isch die Luft sichar gsund
fahla tuat 'm lei mia dar Hiaterhund.
Auf dar Hitta gibt's sicher ab und zua a Fescht
da isch dar Hubert mit seiner Ziechoargla dar bescht.

Fam Marth Edmund Helene

Mit'm Edi und d'r Helene isch dös ab Problem,
dia v'rstecka sich olli, miar wissa nu nit voar wem.
Da Heimträner tuat d'r Edi im Kall'r malträtiara
Und d'rneba ou glei an Fernseher installiera.
Kondition schinta tuat er, miar wissas genau
Weil, d'Silerhochzeit onsteaht mit sein'r Frau.
Ober do isch dr Kaller nit d'r richtige Plotz,
do kanntasch sicher wo ondersch trainiera mit Deim Schotz.
Und daß es nocha so isch wia voar 25 Jahr
Lossa miar ou nou a Raketa sogor.

Marth Christiane

Brauchs in Gurnau a Medizin
Christiane hot jo an direkta Droht dethin.
Sie arbeitet in Anton beim Bano in der Apotheke
aber am Abad isch sie mit'm Freund öfters weck.
Was det tuasch eppa olli treiba
well mar gar it wissa, d' Fuirwehr tuat auf jeden Fall an Böllar anreiba.

Landerer Claudia

D' Claudia tuat iatz fescht im Gschäft mitorganisiera,
weil sie isch schua fast fertig mit dem Studiera.
D'r Freund kennt sie guat mit der EDV-Anlag aus
des paßt d'r Elfriede und am Franz sicher guat ins Haus.
Miar wünsch dir no viel Erfolg beim Studiera
drum lassa miar iatz no a Raketa fliega.

Fam Landerer Franz Elfriede

Dr Franz und d' Elfriede tia jed's Jahr an Schiurlaub buacha
da braucht ma sa für Wocha dr'huam gar numma suacha.
Im Salzburgerland komma bärig über Häng acha wedla.
Wer tuat des schua nit gera mega
Miar wünsch enk a schöni Wocha
drum lassa miar iatz an Böller krocha.

Carpentari Jürgen

Vom Jürgen gibt's huira viele Sacha zum dr'fraga,
ob des als stimmt wollt'r ins aber nit geara saga.
Zum Beispiel tuat'r beim Corda Geiger iats numa Schraufa klauba,
sondern als Abteilungsleiter im Gschäft uma maula.
Für die Zukunft hat der Jürgen o a paar Pläne,
und für dia wünsch miar ihm a lange Glückssträne.
Mit d'r Sonja hat'r iats vor um a Neschtle zum schaua,
dia weara halt nacha o an den Carpentari-Wohnkomplex dranbaua.

Fam Carpentari Reinhard Michaela

D'r Reinhard traut sie viel zu und tuat an Kachlofa baa
ober ou hoazt , da kema mar sichar ga schaua.
Dia Arbeit hot si sicher glohnt,
weil iatz isch die Ölheizung a bissli mia gschont.
Holz isch ja nit aus der Walt,
da sparstr iatz sicher an Haufa Gald.
Warm werschas in d'r Stuba sicher hoba
des heart mar von da Leut a so sogä.
Und dass d'Fuirwehr nocha Kassiera kann kema
tia miar iatz zur Vorsicht a T-Shirt mitnehma.

Fam Carpentari Sandrino Rosmarie

Übern Sandrino kenna m'r eigentlich lei berichta
tua di a bisli noch deiner Frau richta.
Nimm sie decht amol beim Ausgiah mit
nocha kimmsch Du bam Tonza nit aus'm Schritt.
B'r Fuirwehr beim Fussball bisch ja recht aktiv,
drum mechta m'r dein Fuirwehrpass o im Archiv.
Dass des im huiriga Jahr klappat mit ins
sech mar di nächst Jahrehauptversammlung in Grins.

Fam Carpentari Reinhard Marlies

Wer isch gwora Hundert - Jahr ?
Gmuant isch's Carpentari - Paar.
Enkari Geburtstag sei so knapp beinand,
sall kannt ma grad muana es zwoa seits wie Zwilling verwandt.
Zu dem Anlass hots in dr Sunna a morz Familienfeier geba
ou d' Fuierwehr losst enk mit ara Raketa hoch leba.

Pfisterer Dieter Köhler Christine

Dia Scheiba wo iatz kimmt aus der Gluat,
tuat dem Dieter und der Christine sicher guat.
Mir hoba g'heart, daß des Paarli z'Gurnau ansässig weard.
Dia Kunde bei ins durch's Riedli louft
der Dieter hot an Bauplatz kouft.
Daß mit der ASTAG - dem Grundablöse- , du die bold numma muasch ploga
tia mar für enk die Scheiba bsonders weit ausajoga.

Pfisterer Peter

Beim Peter isch a Auto lei guat, wenn's gscheit louft,
drum hot'r sich letscht Jahr glei 3 Auto zum probiera kouft.
Er hot bei jedem Auto an gscheida Funktionstest gmocht
uaner hot's numma packt
und sein Alfa isch mit'm Peter t's Wiesberg in a Maura krocht.
Iatz isch er stolzer Mitsubishi Galant-Besitzer ,
mal schaua wia long'r fahrt mit dem Japaner- Flitzer.
Der Peter geiht iatz öfter ou auf d'Berg aua,
weil det tuat'r seit nuiestem Lawina verbaua.
Daß dr da douba nia eppas passiert,
iatz no a schiane Scheiba ausaradiert.

Pfisterer Bernd

Übern Bernd wissa mar huira gnuag z'berichta,
was dear angestellt hot, da kantasch ja glatt 2 Seita lang dichta.
Ganz dringend auf's Klo hat'r miaßa untara Fahrt ins Vorarlberg außa,
und grausig war s'Wetter weil es hot ganz fescht greagnat dausa.
Iats war die Frag, geah i vor d'Tür und wear nass ganz extrem,
oder gibt's da nou an andere Lösung für deas Problem.
Die Idee mit'm vor d'Tür giahn hat dar Bernd glei verschmissa,
er hot sich an Karton gschnappt und in sein Firmawoga hinta icha gschissa.
Lei wo er sein Woga stiahn keat hot
hot am Fussgänger kua Ruah it glot.
In am Wasserschutzgebiet hot der Bernd parkiert,
und deswega hot der Beobachter glei Gendarmerie informiert.
Dia hoba prompt bei der Firma vom Bernd in Innsbruck nochfroggt,
warum er des Auto da stiahn lot.
Firma wiederum hoba beim Bernd angrufa und ihm gseht er set si melda beim negschta
Posta,
spateschtens det weart er sich denkt hoba, i hat gscheider gschissa an irgenduan PfoSta
Da Bernd erklet deim Schandi den Sachverholt,
er hat lei aufs Klo miaßa und es war nass und saukolt.
An Vorschlog von ins, bau dr a Rolo in dein Firmawoga
nocha kannsch parka und treiba was da grad willsch und kuaner weard di danach froga.

Haag Sabine u. Peter

Dia Scheiba tia mar weit außa schiaßa
und die Sabine und da Peter in Gurnau begrießa.
Schia hobt's grichtat und renoviert enkar Haus
deis schaut iatz richti gmiatli aus.
Miar weara enk genau unter di Lupe nehma,
wenn ma bold die Scheiba kassiera kema.

Fam Schütz Erwin Christine

Von da 3 - Achser hot d'r Erwin eppa d'Nosa voll
drum sieht ma ihn öft'r mit ama Motorradla, gonz toll
So manchi Fahrtla sein recht schian
Bsunder' s wenn sie noch Kärtn giahn.
D'r Erwin woäß gonz genau
do gibt's a Fescht, grod neba d'r Drau.
Do hot er miaßa d'rbei sein, sall war decht glocht
Ohne ihn hatta sie eppa dös Fescht nit g'mocht,
ba deana Biker, wia ma seat, isch olli eppas los
Do gibt's kua Sperrstund, dös isch famos
Fiar enk zinta miar nou a Raketa on,
weil iatz kimmt d'Nochborschoft dron.

Fam Walter Markus Sybille

Dia Wianer Luft, ma tats nit glouba,
tuat dean zwoa besser wia auf da Soga doba.
Wenn, d'r Markus isch im Burgalond, isch dös a guat'r Grund
Do treffa sie sich z' Wian auf a schiana Stund.
Und daß dös eppas gnutzt hot, sall wissa miar genau
Weil iatz sei sie nocha zu dritt in deam wunderschiana Bau.
Zum Ereignis tian mar heint schua gratuliera
Und lossa ou nou a Raketa marschiera.

Walter Berta

D'Berta sieht ma strohla, sall war decht gloch,
hoba sie aus dem Haus a Schmuckstickli g'mocht.
Nu mit'm Rasa vor'm Haus ischas manchsmol a Gfrett,
do woäß d'r Eugen bam mahia nit, wo er onfonga sett.
Er maht hin nd maht hea und tuta oll's probiera,
nu tuat bam Rosamaher s' Gas nit funktioniera.
Jed'n Tog maht er a kluani Stroaß
und mault
„ bam Teif'l im Paznaun weard s' Gros ou nit so groaß.

Senn Anna

Im Summer siaht mar d'Anna im Garta umchanushta
und schaua, dass die Bluama nit verdurschta.
Wenn d'Brigitte tuat ihren Kater vergraula
kimmt er zur Anna und lasst si kraula.
Dass weitar gsund bleibsch , des hoffa mar vo gonzem Herza
dafür laß'mr dr no a Raketa steiga wie a Kerza.

Fam Senn Werner Brigitte

Dr Werner isch wieder da gonza Winter in Wian
iats sog amol, was isch denn do dunta so schian.
Er druckt die Schulbonk auf dr Verwaltungsakademie
d'Brigitte stöhnt schua, mit der Lernerei isch " Ende nie".
Am Wochenende kimmt er zu seine 3 Mäd'l's schaua
ob sie dahuam woll kuan Bleidsinn baa.
Ober di Brigitte hot alls fescht im Griff
und gibt dem nua Kinderzimmer da letschta Schliff.
Sie tuat an zwoa Schula unterrichta,
und erledigt nebabei die hausfraulicha Pflichta.
Dr Werner engagiert sie toll für des ASI-System
deis kenna mar guat braucha beim nächsta Lawinaproblem.
Miar tia enk no a Raketa weit auða schiaßa
Werner bleib bei ins, nocha muaß d'Brigitte nit olli um di verdrießa.

Senn Evi

D' Matura hat d'Evi s'leatscht Jahr packt mit Bravour
und isch ou glei g'fahra auf Maturareise mit d'r halba Schul.
Danach hat sie an Job angfanga und in Führerschein g'macht
und bei so a'ra Prüfung hat sie lei mi g'lacht.
Daß sie ab'r nit muß auf d'Arbeit loufa,
hat sie sich miaßa an Opel Corsa koufa.

Senn Petra

D' Petra tuat extra vo weit her kema,
und tuat si Zeit fürs Scheibaschloga nehma.
Des isch bei ins a olte Tradition
wo ma kriagt an Haufa Information.
Beim Fußballclub dem LASK tuat d' Petra s'Büro organisiera,
am liabschta wearsch eppa dena Sportler die Walda massiera.
Bei deiner guata Figur kenna sich die Fussballer numma a so konzentriera,
ins wundert's nit , wenn si lei mia verlieria.
Miar kannta di ou guat als Maskottchen braucha,
kimm decht amol zu inserer Fuirwehrprob aucha.

Fam Senn Arnold Ursula

Dr Arnold isch mit d'r Natur v'rbunda
Und draht am Koppsea mit seiner Fischerruata seini Runda.
Nu tian ihn do d'Aufsichtfischer a bissli ploga
Und mechta ihn vom Fischrevier v'rjoga.
Dös kann d'r Arnold ob'r nit verstiahn
Drum sieht ma Ihn a poor Tog spater wieder am Stausea stiahn.
Und wieder hot ihn a so an Aufsichtler kontrolliert,
do war ob'r der Arnold bold explodiert.
Am Zommer Fischeich war Dir dös sicher nit passiert,
drum für die und d' Ursula nou a Raketa marschieret.

Fam Winkler Franz Kreszenzia

Daß s' Winklers guati Wirschtla hoba sall isch klor,
weil wurschta tian sia foscht s'gonz Johr.
Dia V'rwondtschoft isch groß, drum weara dia Wirscht ou nit olt
Und d'r Salchschronk ou nia kolt.
Und s'Schnapsli d'rzua tian si ou salt brenna
Nu ums Obst tian sie oft ins Südtirol renna.
Und daß dia Salch und d'r Brennkessl weiterhin guat funktioniert,
für enk ou nou a Raketa marschieret.

Fam Haslinger Hans Gertrud

In Hans und d'Gertraud sieht ma bei ins alli auf die Berg aui springa
und dabei so mancha Tausender bezwinga.

Weil ma ob'r in andere Länder ou auf schöne Berg kann marschiera,
tia sich d'r Hans und d'Gertraud für 3 Wocha in Nepal plaziera.

Det kann ma tolle Bergtoura mocha,
und außafinda viele nuia Socha.

Daß des ganz Abenteuer isch ohne Verletzungen abgloufa
tian mir no an Böller anroucha.

Fam Plattner Wolfgang Angelika

Wenn bei ins leit an Haufa Schnea
trouma s'Plattners schua vom Urlaub am Gardasea.

Ober s'letscht Jahr kimmt ihna per Telefon zu Ohra,
in ihrem Wohnwoga isch inbrocha gwora.

Dr Wolfgang fährt glei los , er will salber schua,
weil deina Tschingalar kann ma nit traua.

D' Angelika isch schua aus olla Wolka g'falla
drweil war lei demolirt bei dr Tür di Schnolla.

Wolfgang du wearsch miaßa a Alarmanlag inbaua,
dass si dia Inbrecher numma zuchatraua.

Miar schiaßa aucha nou an dicka Brummer,
und wünsch enk am Gardasee an erholsama Summer.

Fam Traxl Richard Frieda

Dar Richard und d'Frieda sein schua long a Paar,
Seite an Seite haba sie bestanda uan ums ander Jahr.

Die goldene Hochzeit haba dia 2 im vergangana Jahr gfeiert kann ma heara,
ja da kann ma ja richtig neidisch weara.

Sou viel Jahr wou ma sich mitnander gfreit, Angst hat und hofft,
deas gibt's in dar heintiga Zeit leider numma gar aso oft.

50 Jahr deis isch schua a lange Zeit und deis mechta mar honoriera,
drum lassa mar enk iats a Raketa fliega.

Kobler Maria

D' Maria hat für huira plant an Urlaub in der USA
det findet ma si nocha am Sandstrand vo Florida.

Bei ins muaß ma no hoaza mit Holz und Kohla
darweil konnsch du di in der Sunna erhola.

Die Scheiba tia mar weit außa schießa
tua den Urlaub nu fescht genießa.

Kobler Gerald

Mit der Linz Textil do geht's bergau
ma siecht's an da Auto vor dem Bau.
Dr greaschta Woga, der BMW
keart dem Gerald wissat's eh.
A' richtig's Chefauto dunkelgrian
mit Ledersitz - da kimm und schau wia schian.
Iatz weart's dem Gerald bold numma gelinga
oll dia Weiberleit aus'm Auto außa zbringa.
Daß ihm deis Auto tuat long gfollla,
lossa miar an Böllar knolla.

FA Gosch Walter

Was setta mar denn zum Walter sogä,
ma heart nuit, ma siecht nuit, es gibt kuane Kloga.
Ab und zua sigt man decht z' Graf spaziera giahn,
sal kenna mar verstiahn, Grof isch holt schian.
Da Betrieb vum Walter mechta mar ou nit vergessa,
dear macht sou schiane Estriche, sal mechtasch oft geara vum Bouda essa.
A Scheiba schicka mar zum Schluß acha und hoffa daß sie sich nit schua am Abschlag
halbiert,
auf daß sich im negschta Johr dein Gewinn maximiert.

Dsubanka Maria

D'Midl isch für ihr Alter alli nou recht guat beinander,
weil wenn ma durch Graf geahrt isch sie alli umanander.
Aber nit lei z' Graf siecht ma d'Midl wenn sie vorm Haus steahrt,
ma kann sa ou öfter beobachta wia sie vum inkoufa vu Landeck z'fuaß huamgeahrt.
Midl, wenn ums Haus hasch amal an Arbat oudar sinscht a Habari,
riaf d'Fuierwehr an und miar setza in Gang insar ganz Maschinerie.
Was setta mar dar sinscht winscha als an Haufa Glick und vorallem Gsundheit,
daß nou lang kansch spaziera giahn und kimsch unter d'Leit.

Schlatter Maria

D'Maria hat ma letscht Jahr gsecha mit am dicka Bauch umalaufa,
viel Leit hoba sich denkt, da gibt's glei eppas zum Taufä.
Daß deas nit a so darneba isch,
sigt ma dran, daß iatz liegt an kluaner Bua auf'm Wickeltisch.
Miar hoba darfragt, daß deas Biabli auf'n Name Heimo heart,
wer woas, ob der liebe Fratz nit amol an guater Fussballer weart. (H. Pfeifenberger)
Und weil der Junior friaher oder spater gera umanander louft,
haba sich d' Maria und der Heimo senior glei a groaße Wohnung kouft.
Miar hoffa es gfallt enk und es seits auf der Öd douba geara,
Vielleicht kann ma sogar det nou - insert Böller für enk hearä.

Schlatter Harald

Dar Harald hat a guats Johr verbracht,
ma heart nuit, ma sieht nuit, dear gschentat eppa alli in dar Nacht.
Im Summar ischas gwesa da isch dar Harald kurzfristig mit auf'n Gardasee gfahra,
am Brenner hat 'r s'erscht mal angruafa er hat fascht kuan Benzin mia in seim Karra.
Ankema am Sea und schua in dar Sunna glega,
isch'r draukeima er kannt ja mit dar Freundin ou amal reda.
Er hot nämlich ausgmacht daß'r mit ihra Essa geiht,
deas isch aber nit möglich weil'r ja iatz am Gardasea dunta steiht.
Sei Auto hat'r heargeba und an Subaru Justy kouft,
ob der ou a so guat wia dein alter Mitsubishi louft ?
Im Harald isch in St. Anton mit seim Ratrak z'langweilig gwoara,
da ischas alli a sou kolt und wenn da nit aufpassasch sein dar da glei a poor Zeacha
abfroahra.
Und weil'r ja letschts Johr da LKW Führerschein bestanda hat,
hot'r sich denkt i frog beim Kofler ob mi dear zu aso am Karra zuachalot.
Am ersta Tag hot'r glei alluan ins Kühteiliefara miaßa,
da hot'r zwar s'Zuig nou nit kennt aber deas isch kuan Grund zum verdriaßa.
Bei uanar Kundschaft hot'r gar nit gwisst was für an Fisch,
da hat'r sich denkt leag i dem Koch holt glei alla was i auf'm Karra han auf'n Tisch.
Ma muaß sich holt lei z'halfa wissa und nit glei verzoga,
ou wenn ma an Haufa verschiedene Fisch hot auf'm Woga.
Ja Harald, frag in Thomas und in Christian deas mit dena Wara hasch glei amol daußa,
daß as a bissli schnellar geiht hua mar dar iats nou Scheiba weit außa.

Fam Schlatter Engelbert Stefanie

D' Stefanie hot oll Tog a Freid,
wenn jede Henna a Goggali leit.
Nu der Geier macht ihra Kopfzerbrecha,
wenn er tuat beim Rundflug nach da Henna spechtla.
Ackerscheucha hoßt des Zauberwort,
a poor Wocha bleibt der Geier fort.
Aber galiga hot der Vogel dergitzt,
daß olli s'gleiche Gwond am Huanza pickt.
Olli öfter braucha die Schuicha a'onders Gwond
D'Stefanie sammelt schua Fetza im ganza Lond.
Z'letscht ortet deis aus in an wora Stress,
dia Huanza braucha oll Tog an nuia Dress.
D'Fuierwehr lot iatz a Raketa steiga
um dia Vögl all z'vertreiba.

Nöbl Hannes

Huira kannt ma übern Hannes viel berichta
drum tia mar dir a schians Gedichtli dichta.
Beim Lehnhart im Büro lass die det lei it ploga,
sinsch tuasch es lei d'r Fuirwehr sogä.
Aber vo dr Arbeit well mar gor it long schreiba,
du tuasch ja sinsch gnuag treiba.
A Freundin ausm Paznaun hot 'r schu a lange Zeit,
und wenn die was seit , isch dr Hannes für alles bereit.
Mit'r Daniela des isch sichar an Genuss
aber in Sölden mit da Pianner des Eigentor des war der falsche Schuss.
Bei der Fuirwehr isch der Hannes sehr aktiv
und bringt fürs Scheibaschloga alli viel Sprichla ins Archiv.
Für die Gedichtla was alli machsch,
und beim Schreiba manchmal salber lachschi,
und weil mar si des zerscht amol muaß traua
loss mar dr iatz a Raketa aua.

Nöbl Thomas

D'r Thomas hot über d'Fuirwehr da LKW-Schein gmacht,
da hat'n glei an Job als Fohrer anglacht.
Zuar gleicha Zeit hot dar Streng Bau an HIAB-Fahrer wella,
na haba sie sich beada denkt, weara mar eppas mitnander darstella.
Am erschta Tag dar Thomas um d' Bierkallerkurva biagt,
und hinta schua sei gonza Ladung über d' Portwand ausa fliagt.
Dar Thomas weart sich denkt hoba iat's lass I alla glei wissa, daß I mit am LKW fahr,
weil wenn I am Weg bin houßt deas für alle Gefahr.
Wenn dr Thomas durch d' Stadt geahrt schreit alli uanar kim her,
mir wissa nit wear, isch deas eppa dar Frisear ?
In Sölden will si dr Tommi aufreiða a poor steile Hasa
gfunda hob' marn nacha mit ara bluatiga Nosa.
Iats schloga mar dar nou a Scheiba weit auða,
vielleicht sigt ma sa nou im Bierkaller dausa.

Nöbl Anna

Liabe Leit, miar hoba erscht iatz dr'frot
daß d'Anna öfter s' Hüttafiabar plogt.
S' Wetter isch gwesa wunderschian
drum lossa si' s Auto am Christoph doba stiahn.
Ihr Ziel war des Kaltaberger Haus
aber am Weg geahrt dr Anna die Puste aus.
Dr Egon und dr Arnold wella glei an Hubschrauber alamiera
aber da tuat d' Anna lautstark protestiera.
" Außer der Fliegär bleibt am Plon doba stiah
sinsch miaßt I ja z'Fuaß vo Zams aua giah !"

Nöbl Ferdinand

Dr Engl nimmt 'n Ferdl mit zum Auto - anschau
wia er huamkimmt kann er seina Ouga nit traua.
Dia Stuba isch gwesa voller Gescht
seina Weiberleit hobam organisiert a morz Fescht.
Ja Ferdl , miar kennas fascht nit glouba
iatz hosch a halbs Jahrhundert am Buckl douba.
Zu dem Fescht gibt's a Ferkl am Spiess
des war sichar aus Engels Schweineverließ.
Ou d' Fuirwehr tuat mit gratuliera
und wia kannts andersch sei, zu dem Anlass a Raketa spendiera.

Kirschner Katharina

D'Kathi tuats ganz Johr tüchtig spara,
und wia ma darfrogt in Urlaub nach Italien fohra.
Da gibt's zum Essa Nudla und Pizza,
und in dar Therme kann sie fescht schwitza.
A poor andere nette Pensionista sein ou mit dabei,
da gibt's alli a morts Hetz und es dunkt alla fei.

Gapp Sabine

D'Sabine haba mar huira s'erste mal auf dar Lista,
am Anfong haba mar ins denkt miar tata geara eppas schreiba wenn mar lei irgendeppas
wishta.
Mittlerweile hab mar decht a poor Sacha darfragt,
sou ischas halt wenn ma alli a bissli d'Ohra offa hat.
D'Sabine arbeitet im Vitalclub in Grins,
miar Fuierehrlar wissa des weil miar haba an Haufa Bodybuilder unter ins.
An blonder Engel isch die Sabine nou darzuah,
miar glouba dia hat vu die Mander nia lang a Ruah.
Sabine, miar arbeita schua long dran insare Biarbeich abztrainiera,
du kanntasch ins halfa und an Kurs lei für Fuierehrlar organisiera.
Zu aso am Training kama mar alle recht geara,
vielleicht kannt aus'm uana oder andara nou an kluaner Schwarzenegger weara.

Fam Ruetz Markus

Dar Markus und d'Christine haba sicher a erfreulichs Johr gket,
weil dar Storch hat ana a Biabli in die Wiege glegt.
In Nama Jakob haba sie dem Racker geba,
mit dem Wuzel wearats sicher an Haufa schiane Stunda darleba.
Markus, eppas anders hat ins nou beschäftigt,
dei Auto steahrt oft im Schnea, hasch du kua Schaufla oder isch dars ausschaufla lei z'lest!
Da fahrt dar Markus liaber mit'm Bus,
weil sinscht kannt'm passiera daß'r miaßt nou an Kies straha zum Schluß.
Recht hasch Markus, und guat für die Umwelt ischas nou darzu,
und du mechtasch sicher a guats Vorbild sein für dein kluana Bua.

Petter Hedwig

D' Hedwig isch als negschte auf insarar Lista douba,
sela mar über Sie schimpfa oder sella mar sa loubä?
Als erst miaßä mar amal a ernst Wörtli mit ara reda,
es schaut aso aus als benimmt sie sich s'ganz Jahr nit darneba.
Da fällt's ins natürlich schwar a guats Sprichli z'schreiba,
wenn d'Leit alli brav sein und s'ganz Johr kuan Bleadsinn treiba.
Vielleicht stellsch ja huira eppas an,
nacha henga mar s'negscht Jahr an d'Scheiba nou an Böller dran.

Fam Thurner Udo, Evelin

Vom Udo und dr Evelyn hob mar keart
daß es bei ihna bold a Poppali geba weart.
Udo du kannsch zwar Wasserleitunga stickla,
bald wearsch aber miaßä dei Poppali wickla,
aufstiah, wenn's in dr Nacht amol schreit,
Pappali kocha, spaziera giah und was es sinsch no geit.
Für des Ereignis wünschä mar enk's s'bescht
und schiaßä auchä a Raketa z'letscht.

Walser Wolfgang Valtolini Bianca

Miar mechta da Wolfgang und d'Bianca in Grof recht herzlich begriaßä,
und ihna am Anfang vum Sprichli glei a Scheiba ocha schiaßä.
In aso a nius Örtli (Ortschaft) ichä keama isch sicher nit leicht,
ma kennt kuane Leit, und wen fragt wenn ma eppas breicht?
D'Fuirwehr isch nit lei da wenn's brennt sondern ou für andere Socha,
also wennats a poor Mander brauchats miasats lei an kurza Anruaf macha.
Zum Schluß mechta mar enk nou über a kluans Geheimnis aufklära,
miar Fuirwehrlar meaga aso a Kista Bier zur Begrüßung schua recht geara.
Also wennats uane umastiahn habats und nit wissats wohin,
meldets enke amal und miar packa sa am schnellschta Weg in.

Pammer Herbert Kathrein Anni

Der Herbert und Anni sein viel beschäftigte Leit,
da hat sie nach der Arbeit z'inhoaza gor numma gfreit.
So hoba sie sich nocha beade entschlossa,
und glei drau an nuie Heizung angeschlossa.
Bei dera Arbeit lat si halt nit vermeida der Dreck,
aber dafür habat's iatz ja dia Kälte weck.
Dia 3 rota Auto , dia da parka vor inserm Fuirwehrhaus
schaua fascht wia Fuirwehrwoga aus.
Da kannt intz leicht amol passiera
dass mar mit dena zum Insatz marschiera.

Fam Moschen Richard Anni

Im Winter kann der Richard numma so guat spaziera giah
aber iatz weard der Weg wieder aper und schia.
Und wenn vom Richard Biena wieder fliega
weard er schua wieder an Auftrieb kriega.
Nocha konsch wieder aufm Bankla hocka
und die Rössla mit 'm harta Brot zuchalocka.

Bonell Markus Jetzinger Sabine

Am Anfang mehta mar enk 2 in Graf recht herzlich begriäa,
und zum salla tian mar enk iats glei an Böller schiaäa.
Dar Markus tuat vu Beruf Lawina verbaua,
deas isch eppas schians, da kansch unter dar Arbeit vum Berg achaschaua.
D'Sabine isch unter ins Fuierwehler nou nit aso bekannt,
dia weart dar Markus schua alli fahra bei dar Hand.
Miar kenna lei saga Markus, lass die Sabine amol aus,
und schick sa zu ins aucha ins Fuierwehrhaus.
Zum Schluß mehta mar ins bedanka daß ins hosch z'Nuijohr umagfiehrt,
weil mankmol kimmt's voar daß ma da uana oder andera beim Nuijohrla verliert.

Knabl Erika

Im Thurnerhaus isch a nuis Gsicht inzoacha haba mar keart,
ob deas die Knabl Erika sein weard?
Miar wissa deas natürlich ganz genau,
sie steht ja auf insarar nuia Lista drau.
Was sella mar zur Erika soga außer daß mar sa nou nit kenna,
mocht da nix draus wenn da sigsch amol a paar Fuierwerhlar vor deem Haus umarennä.
Dia wella lei eppas über die außakriaga,
damit s'negscht Johr a gsalznes Sprichli kriagscht und dia Scheiba muaß nit aso allein
ausfliaga.
Vielleicht lasch die ja amal in dar Fuierwehrrhalle blicka,
du kantasch ins aber ou deine Schandtata per ingschriebana Brief zuaschicka.

FA Wille Harald

Beim Harald weart dr Umsatz iatz nocha wieder steiga
wenn sie in Strenga da Tunnel vorontreiba.
Do weara sie sicher an Haufa Zement drzua braucha
den wearsch ihna nocha in Silo ichaschlauchä.
Miar lossa no an Böller knolla,
dass dein Umsatz sell nit folla.

FA Wille Egon

Vom Egon d'Auto sei numma alla gelb und gria
er hat ou a paar andera dunta stiah.
Bei mancha Auto sei d' Plana dunkelblau
und da steat gonz groß Delacher drau.
Tuasch es iatz mit am Partner probiara
dass du konnsch nou mia Socha umafiara ?
d`Fuirwehr kimmt glei amol d`Scheiba kassiar.

FA Kofler

Dar Kofler tuat Gmias verkoufa Jahr für Jahr,
da kansch keama wenn da wilsch du kriagsch alli a frische War.
Ma hat schua saga gkeart daß dar Kofler an Teil vu dar Grafer Fiuerwehr sei,
es sein nämlich drei Fuirwehrmander aus Graf beim Kofler dabei.
Miar hoffa daß sie enk mia Umsatz bringa wia Schada macha,
weil miar haba keart daß sie öfter a Kista Gmias lassa auf`n Bouda kracha.
Bei insrar Weihnachtsfeier haba mar Nüss und Orange ket vum Kofler ganz frisch,
lassats enk sogä dia sein recht guat gwesst weil sinscht kama sie ins nit auf`n Tisch.
Zum Schluß winscha mar wia alli daß d`Geschäfte guat loufa,
und daß`ats ou negscht Jahr tiats an Haufa Gmias verkoufa.

Horvarth Martha

Im Summar hat sich d'Martha narrisch gfreit,
über die Hilfe der Nachbarsleit.
Sei vom Sogschneider halbe Beim vor der Tür glega,
und zu allem dazua, hat s Werkzeug numma mega.
So hot sich der Gerald und d'Hubert anbota,
und gemeinsam haba sie die Prügel klopa.
Nocha hat d'Martha wieder schlofa kenna mit ruhiga Gedanka,
und mit ama Böllar wella miar iatz den Helfer sakrisch donka.

Horvarth Thomas

Dr Thomas kann ma oft in Pians drinna secha
womöglich weil da isch an Fussballplatz in der Necha.
Ma heart er tuat da die Jugendmannschaft trainiera
wia mar secha konn, tuat an des fescht fasziniera.
Unterm Spiel tuat er viel gschaftla und isch ou salber mit dabei
und hängt Zunga bis zum Boda, wenn s'Spiel isch vorbei.
Vorm Turnier in Sölden hot er angrufa " Allna an schiana Gruaß -
es tuat mar recht load, I hann an Nagel im Fuaß."

Fam Horvarth Erich Elisabeth

Dr Erich hat huira im Früherbst a Ausstellung im Burgenland ket,
da kann er lei sogä, mit dera Durchführung in Ostösterreich isch as a Gfrett.
Angfanga hats, dass der Tourismusverband nuit zugschickt hat,
dr Erich weart si denkt hoba ob ma da nit s'negscht mal d' Finger davon lot.
Hundsmiad kimmt er im Kulturzentrum Güssing an
wo sei denn da dia Hangl -- wo häng I iatz dia Bilder dran ?!
Schlussendlich isch dia Ausstellung decht an Erfolg gwora
und so war ou glei vergessa dr gonze Zora.
Erich tua du mit deiner Familie in Westösterreich bleiba
nocha darsporschtar an Haufa Nerva und Leida.

Fam Nitsche Kurdoglu Gerald Brigitte

Dr Gerald hot iats wieder a Londegger Autonummer
er bleibt deismol wohl länger wia bis zum Summer.
In Grof, do isch es decht no am schianschta,
do isch a Stund früher in d'Schual giah s'ollerklianschte.
Miar hoffa, miar kenna auf di in Grof no long zähla
drum lossa miar iatz no a Raketa aua wedla.

Nitsche Christoph

Was wella mar übern Christoph schreiba,
z'Graf heart ma nit was sie in Wien dunta aso treiba.
Bisch alli nou beschäftigt mit deem Studium
oder schlagsch die schua mit die Tücken vum Berufsleaba umadam?
Gseacha hat die vu ins schua lang kuaner mia,
hasch nit amol in dar Neach vu dar Fuierwehrhalle zum tian?
Nachä kanntasch ja amol an Sprung icha schaua und ins alls darzela
was aso passiert in deem Studentenleaba.

Schweiger Eva

Wos d' Eva a sou macht isch niamand klar,
deis liegt eppa dran dass sie nit da isch s' ganz Johr.
Im Fruajahr isch sie in Australien gwesst,
ob sie da troffa hot a paar Aborigines ?
Reisebericht ham mar alli nou kuan kriagt,
obwohl deas a poor Buaba bei dar Fuierwehr brennend interessiert.
Was sie sinscht a sou alluan in deem groaßa Haus tuat woas niamand a sou genau,
aber dia Bude steaht nou, also schaut sie decht ab und zu drau.

Fam Schmid Robert Monika

Beim Robert und der Monika siagt ma öfter a paar Rodl vor dr Tür stiahn
so mancher hot si gfragt , was weara di eppa mit dena Schlitta tian.
Ob'r miar wissa des natürlich gonz genau
weil d'Monika war aufm Foto in der Zeitung drau.
Beim Pensionischarodelrenna in See isch sie gstonda am Podest gonz douba
für die Leistung mecht mar di wirlich fescht louba.
In Robert haba mar vermißt auf der Ergebnislishta
bisch eppa überaus aufm halba Weg vo dr Pischta.
Wenn snegscht Johr ou bisch auf dem Siegerfoto drau
spendier mar dar a Raketa obadrau.

Maidel Johann

Dr Johann tuat numma alluan durchs Leba giahn
des kenna miar sehr wohl verstiahn.
D' Olga isch a gonz a ruhige Frau
und kimmt aus'm Pitztal des wissa miar gonz genau.
Und dass ma kimmt ausm Alltagstrott außa,
hoba sich die zwoa denkt, wera mar nach Montegrotta sausa.
Hoffentlich hobt's enk guat erholt
Fuirwehr für enk iatz a Scheiba aus der Gluat außa holt.

Maidel Wilfried

Ja Willi, was miaßa mar denn vu diar heara,
di tian d'Löcher in da Schi anständig steara.
Da tuat'r schleifa, wachsla, poliera,
was ma halt tuat beim schipräpariera.
Ab und zua flickt'r a poor Löcher aus,
und deas Ganze tuat'r douba in Serfaus.
A Freindin aus Fendels hot dar Willi ou nou darzua,
im Winter weartar sa nit oft seacha weil da isch öfter dar Lawinaschränka zua.
Zum Schluß weara mar dar nou a Scheiba übern Bichl acha schicka,
vielleicht treffa mar a paarli Schi, nacha hasch wieder eppas zum Flicka.

Matt Christian

Dar Christian hat im huiriga Johr viel darlebt,
und einiges davon isch ou gonga darnebt.
A zeitlang hat man gseicha mit ara Halskrause umaspringa,
miar haba ins gfrogt was isch denn da passiert daß'r sich muaß in aso a Zuig ichazwinga.
An Unfall beim Asya-Cafe war Schuld an deam Verband,
aber deis war nou s'wianigscht, mit dem wou'r zamgfahra isch isch'r Verwandt.
Dar Christian isch seim Vater im Richard frontal ins Auto gfohra,
er weard sich denkt haba, nacha ischas dar Wert und es muaß nit lei i auf a nuis Auto spa
Im Jänner isch nacha s'negschte Unglück passiert,
er hat bei am Sturz über a Stiaga glei 2-Gipsarm kassiert.
Ja wer 2 Arm im Gips hot kann bald überhaupt nit mia macha,
aber wenn ma deis aso sieht nacha ischas schua decht a bissli zum locha.
Hoffentlich bisch im negshta Jahr unfallfrei,
nacha bisch ou beim fuaßballna in Sölden dabei.

Fam Matt Richard Rosi

D'r Richard und Rosi sei im Oberland,
als Trafikonta Ehepoor bekannt.
Nit nu Innadrei in dr Traffik tia sie modernisiera,
sondern ou außa a frische Forb aucha schmiera.
Sei Kundschaft hot do aber kua Freid,
oll's voll Forb - isch deis it bleid.
Da negshta Onstrich mochs mit Bedocht,
am beschta noch Feierabat in dr Nocht.
An Böller lossa mir iatz krocha
setsch wieder a'mol an Onstrich mocha.

Fam Matt Egon Annemarie

Egon's Parkplatz vorm Haus isch it groaß
aber olli mit'm Beisa kehra isch ou an Toas.
Do hot er an Gedankablitz
und schua isch a Kehrmaschin in seim Besitz.
Mit dera Kehrmaschin geht's iatz gonz flott,
daß er mia Freizeit für d'Annemarie hot.
A Raketa lossa miar iatz steiga
daß dir die Freid an dera Maschin tuat bleiba.

Matt Andreas

Mit dera Scheiba, wos miar iatz schiaßa
tia miar da Andi s'erschtmol auf der Lischta begrießa.
Im Beruf in Anton doba stellt er sicher sein Monn,
und draht jedem glei a'paar rutschiga Bretter on.
Ou als Autoverscherbler hot er sich versuacht,
und an sotta Gewinn verbuacht.
Set die der Gewinn im Housasack gor z'fescht wetza,
tia mar'n in der Fuierwehrhalla in Bier umsetza !

Prantauer Schimpfössl Anna Fini

Für d'Fini wor deis an Graus
wia d'Anna wor im Kronkahaus.
O`gonga seids ins olla jo schwar
in Grof wor's ohne enk gonz laar.
Für d'Gsundheit winscha miar enk s'bescht
und der Böller knollt gonz fescht.

FA Jais Werkstätte

Dar Jais tuat wia all Jahr Roafa verkoufa,
sal isch halt wichtig daß d'Auto im Winter in d'richtig Richtung loufa.
Ma kann sich beim Jais den Gummi ou montiera lossa,
da weart ma nit dreckig und fangt da Winter nit am Anfang schua an zum hassa.
Auf da letschta Winter aucha weart dar Reifenservice sicher ou gnuag Roafa auf Lager
haba,
sinscht miaschta d' Urlauber ihra Auto zamt da Summerraoafa in d' Schigebiete traga.
An haufa Kunda winscha mar für's negscht Johr und viel Glück,
und für deis kracht iatz an Böller ganz dick.

Meier Gerlinde

Für die Gerlinde tritt iatz a nuie Phase in Kraft,
weil letschtes Johr hot sie es iatz endlich oh schua zur Oma gschofft.
In Innsbruck do wohnt der stramme Enkel, ded tia mir darfroga,
do wersch du dir denka, det kann er mi nit allzuviel ploga.
Obar hi und do wersch'n schua decht amol bsucha,
und hoscht dir denkt do muaß i mir auf mein Opel a Innschbrucker Nummer aua buacha.
Drum Gerlinde loß dir zu dem Enkel gratuliera
und wos des mit dernuia Autonummer hoäßt, erklär'sch ins beim Scheibaschlaga kassiera.

FA Streng

Wie mir eh schua völlig olla wissa,
hot die Natur d'r Firma Streng im Starktol des Programm komplett druchanonder
g'schmissa.
Bodamechaniker, Geologa, Wissenschaftler und sinsch no an Haufa gscheidi Leit hot ma
gsecha zamma renna
weil die Gegend wor noch dem Ereignis numma zum kenna.
D'r Helmut nimmt des obar mit frischem Elan,
und kümmert sich glei für den Wiederaufbau für an nuia Plan.
Fescht treibt er dia Arbeiten iatz voron,
daß die Firma im Summer wieder Material verkoufa kann.
Beim Personal do bleibt die Zeit oh nit stiah,
weil do gibt's wieder an Baumeister mia.
D'r Thomas hot vor a poor Tog die Baumeisterprüfung absolviert,
und zu dem Anloß dir die Fuirwehr mit Böller und Raketa recht herzlich gratuliert.

Asia Cafe

Im Asia Cafe da isch alli eppas lous,
da kantasch bald muana da sein andauernd irgenwelche Gala-Shows.
Dear Parkplatz isch alli grammelt voll,
und sal nit zu unrecht deas Lokal isch wirklich toll.
Miar haba's mit dar Fuirwehr schua ua zwoamoal ausprobiert,
lassats enk sogä daß ma da an guata Kepab konsumiert.
Um s'Gschaft braucht ma sich bei enk kuane Sorga macha,
drum lassa mar enk iat's für d'Gsundheit an Böller kracha.

Schröcker Evelin

Wilsch Geld auf irgend a Konto überweisa,
geahrt deis ou mit EDV, deis kann dar d'Evelin beweisa.
Bankwesen und Gewerberecht,
vertraga sich im heara nach gar nit aso schlecht.
Dia Scheiba tian mar iats weit acho joga,
kimm halt amol mit'm Bernd zum Scheibaschloga.

Fam Schröcker Herman Elfriede

Dr Hermann hot huira a Jubeljohr
er isch 60, dies isch wirkli wohr.
A groaße Feier hot's bei ins in dr Halle ou schua geba,
miar wünschä dir viel Glück und a longs Leba.
In Londegg heart ma, dass für d'Bergwocht tuasch viel organisiara
weil dies so guat mochs, wearsch den Poschta als Obmonn nit so schnell verliara.
Miar hoffä, dei Gsundheit bleibt dir no long erholta,
und du konnsch dir dei schians Hobby no long kolta.

Hotz Martin

Übern Martin wissa mar soviel z'berichta,
da gab's grad an Haufa Gschichta.
Angfanga mechta mar beim Militär,
da war dar Martin zuständig für'n LKW Verkehr.
Kraftfahrer bei da Jager isch'r gwesst und hot fescht verdrossa,
du, Martin als Jager - hosch da amol a Gamsa gschossa ?
Als Kraftfahrer beim Heer hat'r alli guate Auto ket,
da hat'r sich denkt, beim Landerer steiht a schians Wagali det.
Iat's hat'r sich wieder an Opel kouft,
weil a japanisches Auto halt nit a sou guat louft.
Iat's miaßa mar's lossa sinscht wearts Sprichli z'lang,
viel Glück für die Zukunft und a Scheiba hintadran.

Fam Hotz Stefan Petra

Dr Stefan und Petra haba sich an Wunsch wahr gmacht
und wohna schua bald z'Grins unter uam Dach.
Deas Haus isch mitta im Ortskern glega
wer tat des it gera mega.
Dr Stefan taut fürs Renoviera viel umastudiera
daß dr des guat gelingt lossa miar iatz a Raketa fliega.

Fam Hotz Raimund Monika

Dar Raimund isch an Mann der Tat,
drum war'ar friahr ou im Grinner Gemeinderat.
Ou Innungsmeister vu die Tischler isch dar Raimund viel Johr lang gweisa,
aber deis hot sich iatz geändert hot ma kenna in dar Zeitung leisa.
In deara Funktion hot dar Raimund sicher allerhond bewegt,
er weart sich denkt haba, uanmal isch gnuag und hot sei Amt im Jänner niederglegt.
A großes Dankschian noamal, daß mar kenna haba in deiner Werkstatt für
d'Fuirwehrhalla an Kasta macha,
und für deas lassa mar dar iat's an ganz dicka Böller kracha.

Hotz Lydia und Beate

Pension Kristall isch international bekannt
daß jeder zwoate Gast glei danach verlangt.
D'Lydia und d' Beate tia sie viel für d'Gäst o'ploga
tia glei bei d'r Ankunft ums Befinda froga.
A Langlaufloipa hoba sie baut vis-a-vis vum Haus
viel z'schnell hat's gregnet und mit dem Spass wars aus,
aber dia Idee verdient trotzdem an Applaus.
Miar wünsch enk viel Glück im nuia Jahr
drum lassa miar fliaga a Raketa wunderbar.

Hotz Hannes

Dr Hannes hat sie an Hund zuglegt
des isch für ganz Graf a Gfrett.
Der Colli tuat insera gonza Ort inspiziera
weil dr Hannes geat ja kaum mit ihm spaziera.
D'Fuirwehr tat o halfa beim Sucha
mir mechta halt danach no Kaffee und Kucha.

Fam Hotz Oskar Edith

Dr Oskar hat' sie gonz auf sei Enkel ingstellt
drum hat er si an Familienvan mit Kindersitz bstellt.
Des Auto hat sogar no sieba Sitz
da kenna no kema 5 andere kids.
Vielleicht kenna mir wieder amol zu ama Enkel gratuliera
drum lossa miar iatz a Raketa fliega.

Marianne -Gerhard Kopp (Gäste BRD)

D'negscht Scheiba isch vo ama bsundera Birkastock
dia lossa mar für d'Marianne und da Gerhard vom Bock.
Seit 28 Jahr keima sie vom Deitscha do hea
Im Summer zum Wondera im Winter weg'm Schnea.
Da letscht Herbscht isch d'Marianne keima a bissli z'spat
guat war wenn Sie huir friaher onreisa tat.
D'Marianne und d'Berta keara gera a bissli zua,
aber im Herbst wella die Hittawirt ou ihr Ruah.
Ma kannt da Gerhard schicka voraus schaua,
und wenn zua isch a 'Standli aubaua.
A Raketa lossa miar fürn enk marschiera,
und tiats dem Schreiber a Schnapsli spendiera.